

每週經課朗誦經文(巴克禮漢羅/教羅)2013/11/03

共同經課 - 1 哈巴谷書一章一節~四節，二章一節~四節

1 先知哈巴谷所得 tiòh ê 默示。2 耶和華 ah，我喉叫，你無聽，beh 到 tī 時 ah？我因為強暴叫苦，你 iáu 無拯救。3 你啥事 hō 我看見罪惡？橫逆 ê 事，你啥事定定看？毀滅 kap 強暴 tī 我面前，相爭相 phah lóng 發起。4 因為 án-ni 律法放鬆，無行公平；pháiⁿ 人圍困義人；所以審判無正直。1 我 beh khiā 守更樓，khiā tī 營寨觀看，看祂對我講甚麼話，我 thang 用甚麼話來訴明。2 耶和華應我講，寫 chit-ê 默示，明明刻 tī 板裡，hō 讀 ê 人也 thang 走。3 因為 chit-ê 默示 iáu 有定 tiòh ê 期，beh 緊緊結局，決斷無白賊；雖然延 chhiàn，iáu-kú tiòh thèng 候；因為的確會到，無 koh 延 chhiàn。4 看 ah，伊 ê 心神自高，tī 伊 ê 內面無正直；獨獨義人 beh 對伊 ê 信來活。

共同經課 - 2 詩篇一百一十九篇一百三十七節~一百四十四節

137 耶和華，你是公義 ê；你 ê 判斷亦是正直 ê。138 你所命令干證 ê 話，是照公義，極其誠實。139 我 ê 心熱，親像火燒滅我；因為我 ê 對敵 boē 記得你 ê 話。140 你 ê 話鍛鍊到真精；所以你 ê 奴僕真意愛。141 我卑微，hō 人看輕，總是我無 boē 記得你 ê 教示。142 你 ê 公義是永遠 ê 公義；你 ê 律法是真實。143 我 tú-tiòh 患難憂苦；總是你 ê 誠命是我所歡喜 ê。144 你干證 ê 話永遠是公義；求你 hō 我智慧，我就會活。

共同經課 - 3 帖撒羅尼迦後書一章一節~四節，十一節~十二節

1 保羅 kap 西拉以及提摩太，phoe 寄 hō 帖撒羅尼迦人 ê 教會，就是 tiàm-tī 咱 ê 父上帝 kap 主耶穌基督 ê；2 願 lín tùi 父上帝 kap 主耶穌基督得 tiòh 恩典平安。3 兄弟 ah，阮應該為 tiòh lín 常常感謝上帝，這本是合宜 ê，因為 lín ê 信益發長大，koh lín 眾人 tàk ê 相疼 ê 心 lóng 充足；4 致到阮 tī 上帝 chiah-ê 教會將 lín 來誇口，因為 lín tī 一切 ê khún-tiòk kap 所受 ê 患難中，有存吞忍 kap 信 ê 心；ll 為 tiòh án-ni 阮也常常替 lín 祈禱，願咱 ê 上帝看 lín 做能堪得 tī 所受 ê 召，koh 用權能來完滿一切所欣慕 ê 好，kap tùi 信所做 ê 工，12 hō 咱 ê 主耶穌 ê 名 tī lín 得 tiòh 榮光，lín 也 tī 伊得 tiòh 榮光，照咱 ê 上帝 kap 主耶穌基督 ê 恩。

共同經課 - 4 路加福音十九章一節~十節

1 耶穌入耶利哥，teh 過去 ê 時，2 有一人名叫撒該，是做抽餉 ê 頭人，也是好額。3 伊 ài beh 看耶穌是甚麼人，但是人 choē，看 boē tiòh，因為伊身軀矮細。4 就走做前，peh 上桑 chài 樹，beh 看伊；因為耶穌 beh tùi hia 過。5 耶穌到 hit 位，kiáh 頭看伊講，撒該緊緊落來，因為今 á 日我的確 tiòh tiàm 你 ê 家。6 就緊緊落來，歡喜接納伊 7 眾人看見，ngáuh-ngáuh 念講，伊入去歇 tī pháiⁿ 人 ê 厝。8 撒該 khiā-teh，對主講，主 ah，我將所有 ê 一半 hō sòng-hiong 人；若是 bat 歪甚麼人，就將四倍賠伊 9 耶穌對伊講，今 á 日拯救到 tī chit-ê 家；為 tiòh 伊也是亞伯拉罕 ê Kiaⁿ 孫。10 因為人子到，是 beh chhē 失落 ê，來救伊。